

光緒山西通志

鄉賢錄三

錄二之三

山西通志第一百十八

張進士出身頭品頂戴兵部侍郎兼都察院有司都御史巡撫山西提督軍務張烈率
旨監修

後魏

薛提太原人皇始中補太學生拜侍御史累遷晉王丕衛兵
將軍冀州刺史封太原公有政績徵拜侍中攝都曹事宗愛
之變祕不發喪尙書左僕射蘭延侍中和延等議立長君徵
秦王翰置祕室提曰皇孫有世嫡之重人望所係春秋雖少
令問聞於天下廢所宜立而更別求必有不可延等未決愛
矯皇后令徵提等入殺之文成詔提弟浮子襲降侯

王慧龍太原晉陽人晉尙書僕射愉孫散騎常侍紉子也幼
聰慧愉以爲諸孫之龍故名焉宋武誅王氏慧龍年十四爲

沙門僧彬所匿因將過江奔後秦秦滅歸魏明元引見請劾
力南討言終流涕明元動容曰朕方渾一車書席卷吳會卿
情計如此豈不能相資以眾乎然亦未之用後拜洛城鎮將
鎮金鋪會太武初卽位遂停前授初崔浩弟恬聞慧龍王氏
子以女妻之浩見慧龍曰信王家兒也數向諸公稱其美司
徒長孫嵩不悅久而不調後除樂安王範傳領并荆揚三州
大中正慧龍抗表願得南垂自効崔浩固言之乃授南蠻校
尉安南大將軍左長史及宋荊州刺史謝晦起兵江陵引慧
龍爲援慧龍督司馬靈壽等一萬人拔其思陵戍進圍項城
晦敗乃班師後宋將王元謨寇滑臺詔假慧龍楚兵將軍與
安頡等同討之相持五十餘日諸將以賊盛莫敢先慧龍設
奇兵大破之賜劔馬錢帛授龍驤將軍賜爵長社侯拜滎陽

大守仍領長史在任十年農戰並修大著聲績招攜邊遠歸附者萬餘家號爲善政其後宋將到彥之檀道濟侵掠慧龍力戰屢摧其鋒宋遣刺客呂元伯購慧龍首二百戶男絹一千匹元伯爲反間求屏人有所論慧龍疑之使人探其懷有尺刀慧龍曰各爲其主也吾不忍害此人左右皆固諫慧龍曰死生有命彼亦安能害我遂捨之時人服其寬恕慧龍自以遭難流離作祭伍子胥文以寄意生一男一女遂絕房室布衣蔬食不參吉事舉動必以禮太子少傅游雅曰慧龍古之遺孝也撰帝王制度十八篇號曰國典眞君元年拜使持節甯南將軍虎牢鎮都副將未至鎮而卒謂功曹鄭暘曰吾誓願鞭尸吳市戮墳江陰有心莫遂乞葬河內州縣東鄉庶其魂而有知猶希結草之報詔特許之贈安南將軍荊州刺

史謚穆侯將吏共於墓起佛寺圖慧龍及僧彬像而讚之呂元伯感至宥之恩留守墓側終身不去

王寶興慧龍子少孤事母至孝尙書盧遐妻崔浩女也初寶興母及遐妻俱孕浩曰汝等可指腹爲親及婚浩爲撰儀射自監視曰此家禮事宜盡其美及浩被誅盧遐後妻寶興從母也緣坐沒官賜度斤鎮高車滑骨寶興盡賣貨產自出塞贖之以歸州辟治中從事別駕舉秀才皆不就閉門不交人事襲爵長社侯爲龍驤將軍卒

王瓊字世珍孝文以寶興子賜名襲祖爵太和九年爲興寺令十六年降伯帝納其長女爲嬪拜前將軍并州大中正正始中爲光州刺史中尉王顯劾受納獲雪神龜中除左將軍兗州刺史歸京居司空劉騰宅西騰并鄰宅唯瓊終不肖與

以此久見屈抑孝昌三年除鎮東將軍金紫光祿大夫中書令卒贈征北將軍中書監并州刺史自慧龍入國三世一身至瓊始有四子

王遵業瓊長子風儀清秀涉歷經史位著作仕郎與司徒左長史崔鴻同撰起居注遷右軍將軍兼散騎常侍慰勞蠕蠕乃詣代京采拾遺文以補起居所闕與崔光安豐王延明等參定服章及光爲孝明講孝經遵業預講弟延業錄義竝應詔作釋奠侍宴詩時人語曰英英濟濟王家兄弟與中書令陳郡袁翻尙書琅邪王誦竝領黃門郎號曰三哲時政歸門下世謂侍中黃門爲小宰相而遵業從容恬素若處邱園嘗著穿角履好事者多毀新履以學之以胡太后臨朝謀避地自求徐州太后曰王誦罷幽州始作黃門卿何乃欲徐州也

更待一二年當有好處分遵業兄弟竝交遊時俊爲當時所
美及尔朱榮入洛以莊帝有從姨兄弟之親相率奉迎俱見
害河陰贈并州刺史著三晉記十卷

王廣業遵業弟性沈雅涉厯書傳位太尉祭酒遷屬卒於大
中大夫贈徐州刺史子乂有儀望以幹用見稱卒於南鉅鹿
太守贈齊州刺史廣業弟延業博學多聞頗有才藻位中郎
遇害汾陰延業弟季和位書待御史并州大中正贈華州刺
史

郭祚字季祐太原晉陽人魏車騎將軍淮弟亮之後也祖逸
并州別駕前後以二女妻司徒崔浩一女妻浩弟上黨太守
恬太武時拜徐州刺史假榆次侯贈光祿大夫父洪之緣坐
治事祚少孤貧鄉人莫之識有女巫相祚後當富貴祚涉厯

經史習崔浩書工尺牘文章弱冠爲州主簿刺史孫小委之
書記又太原太守王希彥逸妻姪也共相弼鄜乃振孝文初
舉秀才對策上第拜中書博士轉中書侍郎李冲薦之遷尙
書左丞長兼給事黃門侍郎清勤在公夙夜匪懈帝甚賞之
從南征還正黃門以贊遷洛賜爵東光子遷散騎常侍仍領
黃門與黃門宋弁參謀帷幄隨其才用各有委寄祚承稟注
疏特威勸劇嘗夕飲清徽後園孝文舉觴賜祚及崔光曰郭
祚憂勤庶事獨不欺我崔光溫良博物朝之儒秀不勸此兩
人當勸誰也從南討兼侍中拜尙書進爵爲伯宣武初兼吏
部尙書并州大中正尋正吏部持身潔清重惜官位銓授必
徘徊久之下筆卽云此人便已貴矣量才稱職時以此歸之
出爲使持節鎮北將軍瀛州刺史轉鎮東將軍青州刺史逢

歲饑多所振恤士女懷其德澤入爲侍中金紫光祿大夫并州大中正遷尙書右僕射與侍中黃門參議刊正新令故事令僕中丞騶唱入宮門至於馬道祚以爲非盡敬之宜言於帝納之騶唱不入宮自此始也詔領太子少師祚奏前後考格審慎銓衡詔胥詳答之尋加散騎常侍詔營明堂國學祚奏邊郊多壘烽驛未息且獻歲云暨東作將始宜待豐靖之年因子來之力不時而就從之宣武每賞資祚多至百餘萬又特賜劔杖恩寵甚深遷左僕射梁將康絢遏淮將濯揚徐祚表曰蕭氏狂狡擅斷川瀆役苦人勞危亡已兆宜勅揚州選一猛將遣當州之兵令赴浮山表裏夾攻從之除使持節散騎常侍都督雍州刺史征西將軍時領軍于忠恃寵驕恣祚心惡之遣子太尉從事中郎景尙說高陽王雍令出忠爲

州忠聞而大怒矯詔殺祚祚達於政事凡所經履咸爲稱職
每有決斷多爲故事名器旣重時望亦深一朝非罪見害遠
近莫不惋惜靈太后臨朝使弔慰追復伯爵正光中贈使持
節車騎將軍議同三司雍州刺史謚文貞子景佖字思和涉
厯書傳曉星厯占候爲彭城王中軍府參軍遷員外郎司徒
主簿太尉從事中郎公強當世善事貴要世號郭尖遷中書
侍郎未拜卒弟慶禮通直郎子元貞武定末定州驃騎府長
史

王勣字洛誠自云太原晉陽人六世祖橫張軌參軍因居姑
臧父橋字法生解天文卜筮涼州平入京以術自給厯位侍
御中散卒贈平遠將軍涼州刺史顯義侯謚敬叡少傳父業
而姿容偉麗景穆見而奇之興安初擢爲太卜中散稍遷令

領太史承明元年文明太后臨朝超遷給事中俄爲散騎常侍侍中吏部尙書賜爵太原公太和二年孝文及文明太后率百僚與諸方客臨獸園有猛獸逸登門閣道幾至御坐左右侍衛皆驚脫獨執戟禦之猛獸乃退故親任轉重三年春詔與東陽王丕同入八議永受復除四年遷尙書令進中山王加鎮東大將軍置王官二十二人中書侍郎鄭義爲傅中郎令以下皆當時名流又拜叔妻丁氏爲妃沙門法秀潛謀多所牽引叔曰與役不辜甯赦有罪宜梟斬首惡餘從原赦從之得免者千餘人及疾太后與孝文每親視侍官省問相望於道卒太后與孝文親臨哀慟賜溫明祕器贈衛大將軍太宰并州牧謚宣立祀都南置守祀五家又詔褒揚叔圖其捍猛獸狀於諸殿叔既貴乃言家本太原晉陽遂移屬焉

故其兄弟封爵多以并州郡縣子襲字元孫叙卒代領都曹
爲尙書令領吏部曹後襲王例降公出爲并州刺史謚質
尔朱代勤祖羽健父鬱德代爲酋長居秀容川代勤太武敬
哀皇后崩襲征代有功給復百年除立義將軍會閭山而獵
部人射虎悞中其體代勤令拔箭竟不推問曰此旣過悞何
忍加罪部內咸感其德位肆州刺史封梁郡公以老致仕歲
賜帛百匹以爲常卒謚莊孝莊初追贈太師司徒公錄尙書
事

尔朱新興代勤子太和中繼爲酋長畜牧蕃息色別爲羣谷
量之朝廷每有征討輒獻私馬備資糧助裨軍用孝文嘉之
及遷洛特聽冬朝京師夏歸部落位散騎常侍平北將軍秀
容第一領人酋長新興每春秋二時恆與妻子閱畜牧於川

澤射獵自娛明帝時以年老啟求傳爵於子榮卒謚簡孝莊

初贈太師相國西河郡王

以上太原府

薛謹字法順河東汾陰人辯子容貌魁偉隨劉裕渡江爲府記室參軍辯歸魏謹亦來奔授河東太守後襲爵汾陰侯始光三年與宜都王奚斤共討赫連昌擒其東平公乙兜克蒲坂遂以新舊百姓并爲一郡除平西將軍復爲太守神鼎三年除使持節秦州刺史山胡白龍慙險詔南陽公奚春與謹竝爲都將討平之封涪陵郡公太延初征吐沒骨平之謹自郡遷州威恩兼被風化大行眞君元年徵授內都坐大官輔政深見賞重每訪以政道後北討與中山王辰等後期見殺尋贈鎮西將軍秦雍二州刺史謚曰元

薛初古拔謹子本名洪祚太武賜名焉沈毅有器識弱冠司

徒崔浩見而奇之眞君中蓋吳擾動關右薛永宗屯據河側
詔拔糾合宗鄉壁於河際斷二寇往來之路事平除中散賜
爵永康侯太武南討以拔爲都將又共陸眞討氏仇偁檀強
免生平之皇興三年除散騎常侍尙文成女西河長公主拜
駙馬都尉其年族叔安都歸順敕詣彭城勞迎除南豫州刺
史延興二年除鎮西大將軍開府儀同進爵平陽公三年以
善政徵詣京師獻文親自勞勉復令還州太和六年改爵河
東公卒贈左光祿大夫謚曰康子洪隆官河東太守允字甯
宗少有父風拜中散襲爵鎮西將軍河東公官至河北太守
羣盜懾氣郡中肅清卒於郡謚曰敬子裔字豫孫襲爵卒於
洛州刺史

薛胡字破胡謹第三子少有節操篤志於學專精講習不干

時務與物無競以德義服人或有兄弟忿鬪鄰里爭訟者恐胡聞之皆內自改悔鄉閭化其風教咸以敬讓爲先三召州都再辟主簿州將傾心致禮竝不獲已而應之爲本州從事別駕除河東太守兄弟竝爲本郡當世榮之復爲仇池都將後終於家有八子長子聰知名

薛聰字延智方正有理識善自標致不妄游處雖在閭室終日矜莊博覽墳籍尤長占對父憂廬墓側哭泣聲酸感行路家教甚嚴諸弟雖婚宦恆不免杖罰對之肅如也未弱冠州辟主簿太和十五年釋褐著作佐郎時解巾優者不過奉朝請聰起家便佐著作時論美之後遷書侍御史彈劾不避強禦帝或欲寬貸輒爭之帝每言朕見薛聰不能不憚何況諸人也累遷直閣將軍兼給事黃門侍郎散騎常侍直閣如故

親衛禁兵委總管領終太和之世恆帶直閣將軍時政得失
動輒匡諫而外莫窺其際帝欲進以名位輒苦讓帝曰卿天
爵自高固非人爵之所榮也又除羽林監帝曾戲謂聰曰世
人謂卿諸薛是蜀人定是蜀人否聰對曰臣遠祖廣德世仕
漢朝時人呼爲漢臣九世祖永隨劉備入蜀時人呼爲蜀臣
今陛下是虜原鮮卑非蜀也帝笑曰卿自幸可自明非蜀何
乃遂復苦朕聰因投戟而出帝曰薛監醉耳其見知如此二
十三年從駕南征兼御史中尉宣武除都督齊州刺史政存
簡靜卒於州吏人留其所坐榻以存遺愛贈征虜將軍華州
刺史諡曰簡懿西魏重贈車騎大將軍儀同三司延州刺史
裴夙字買興河東汾陰人父桃弓與兄愛醜竝見稱於鄉里
夙沈雅有器識孝文見而異之吏部尙書任城王澄每歎美

夙許以遠大位河北太守以忠恕接下百姓感而懷之卒於
郡三子範昇之鑒鑒字道徽性強正有學涉卒於廷尉卿居
官清苦時論稱之贈東雍州刺史

以上蒲州府

堯暄字辟邪上黨長子人本名鍾葵後賜名暄祖僧賴平中
山時來歸國暄聰了美容貌爲千人軍將太武以其恭謹擢
中散後兼比部尙書時始立三長暄爲東道十三州使更比
戶籍賜獨車一乘廐馬四匹前後從征及出使檢案三十許
度皆有克已奉公之稱賞賜衣服綵絹奴婢等物賜爵平陽
伯授太僕卿轉大司農卒於平城孝文爲之舉哀贈相州刺
史長子洪襲洪子傑字永壽元象中開府儀同三司樂城縣
公洪弟遵位臨洮太守卒謚思遵弟榮位員外散騎侍郎

府

張濟字士度西河人父千秋慕容永驍騎將軍後來奔拜建
節將軍賜爵成紀侯濟涉獵書傳清辯善儀容爲行人拜散
騎侍郎襲爵晉雍州刺史楊佺期乞師帝遣濟爲常山王遵
從事卽報之濟自襄陽還帝問濟江南事濟曰江南全無紀
綱佺期問臣魏伐中山幾十萬眾臣答曰十餘萬佺期曰魏
被甲戎馬可有幾匹臣答中軍精騎十餘萬外軍無數又曰
魏定中山徙幾戶於北臣答七萬餘家佺期曰都何城臣答
都平城又曰魏帝欲爲人都不平城將移也臣答非所知也佺
期聞朝廷不都山東貌有喜色曰洛城救援仰恃於魏道武
嘉其辭後以累使稱旨拜勝兵將軍卒子多羅襲爵坐事除
宋宣字道茂西河介休人父洽爲慕容垂尙書太祖之圍中
山也洽率所領專守北國當洽所統官軍多被傷殺太祖特

深憤恨及城平遂殺之子順訓並下腐刑宣時年數歲親人竊逃以免後與范陽盧子真渤海高允及從子愔俱被徵拜中書博士尋兼散騎常侍使宋加冠軍將軍賜爵中都侯領中書侍郎行司隸校尉真君七年卒贈司隸諡簡子謨字乾仁襲爵卒遼西太子子鸞襲位東莞太守

宋愔與從叔宣博陵崔建俱知名世祖時徵拜中書博士厯員外散騎常侍使江南賜爵列人子還拜廣平太守興安五年卒贈安遠將軍相州刺史謚曰惠長子顯襲爵顯無子養弟子弁爲後弁字義和父叔珍娶趙郡李敷妹緣坐弁才學雋瞻少有美名至京師兄尙書李冲言論移日冲異之曰此人一日千里王佐才也顯卒弁襲爵與李彪迭相祇好彪請爲著作佐郎遷尙書殿中郎中孝文朝會訪政道弁自下而

對聲姿清亮進止可觀帝稱善久之因是大被知遇賜名弁
意取弁和獻王楚王不知寶之也遷中書侍郎兼員外散騎
常侍使齊齊司徒蕭子良祕書丞王融皆稱美弁以爲志氣
謇諤不逮李彪而體韻和雅舉止閑遠過之轉散騎侍郎孝
文問江左事弁曰蕭氏父子無大功於天下旣以逆取不能
順守必不能貽厥孫謀保有南海若物憚其威身免爲幸後
從南征爲司徒司馬東道副將軍有盜馬絆者斬而殉三軍
震懼黃門郎崔光薦弁自代帝不許亦賞光知人尋兼司徒
左長史時大選內外羣官并定四海士族弁專參銓量之任
排高門大族而申達舊族淪滯者多稱旨爲并州大中正遷
散騎常侍尋遷右衛將軍領黃門屢陳讓帝曰吾爲相知者
卿亦不可有辭豈得專守一官不助朕爲政其被知遇如此

孝文在汝南不豫小瘳引見門下及宗室并獻歎流涕由是益重之車駕征馬圈留并以本官兼祠部尚書攝七兵事執其手曰國之大事在祀與戎故令卿綰攝二曹并頓首辭謝并劬勞王事恩遇亞於李冲帝每稱并可爲吏部尚書遣命以并爲之與咸陽王禧等六人輔政而并先卒年三十八贈瀛州刺史謚正順

以上并州府

衛操字德元代人少通俠有才略晉征北將軍衛瓘以爲牙門將當神元時頗自結附後說桓穆二帝招納晉人桓帝以爲輔相任以國事及劉石之亂桓帝匡助晉氏操稍遷至右將軍封定襄侯穆帝三年卒

燕鳳字子章代人少好學博綜經史明習陰陽讖緯昭成素聞其名使以禮致之鳳不應聘乃以軍圍代曰鳳不來將屠

之代人懼遂送鳳昭成待以賓禮後拜代王左長史參決國
事又以經授獻明帝常使 堅堅問鳳曰代王何如人對曰
寬和仁愛經略高遠一時雄王也堅曰彼國人馬多少對曰
控弦之士數十萬見馬一百萬匹堅曰卿言人眾則可說馬
太多鳳曰雲中川自東山至西河二百里北山至南山百餘
里每歲孟秋馬常大集略爲滿川以此推之使人言猶未盡
鳳還堅厚加贈遺後堅欲遷道武於長安鳳固請曰代王遺
孫幼冲莫相輔立其別部大人劉庫仁勇而有智鐵弗衛辰
狡猾多端皆不可獨任宜分部爲二令人統之兩人素有深
讎其勢莫能先發此禦邊之上策待其孫長乃存而立之是
陛下大惠於亡國也堅從之鳳尋東還道武卽位歷吏部郎
給事黃門侍郎行臺尙書甚見器重明元世與崔元伯封懿

梁越等入講經傳出議朝政太武初以舊勳賜爵平舒侯卒
子才襲

許謙字元遜代人少有文才善天文圖讖學建國時歸附昭
成擢爲郎中令兼掌文記與燕鳳俱授獻明帝經後徙長安
從苻堅弟行唐公洛鎮和龍尋以繼母老辭歸登國初遂歸
道武爲右司馬與張袞等參贊初基慕容寶來寇使謙告難
於姚興興遣將楊佛嵩來援佛嵩稽緩道武命謙爲書遺之
佛嵩乃倍道兼行賜謙爵關內侯及慕容垂卒謙勸進并州
平爲陽曲護軍賜爵平舒侯卒贈幽州刺史高陽公謚文子
洛陽襲爲雁門太守進爵北地公卒謚恭

長孫嵩代人父仁昭成時爲南部大人嵩寬雅有器度昭成
賜名焉年十四代父統事昭成末劉庫仁攝國事嵩率部眾

歸之劉顯謀難嵩率舊人及庶師七百餘家棄顯走將至五
原于烏渥勸歸道武見道武於三漢亭爲南部大人累著軍
功後從征中山除冀州刺史賜爵鉅鹿公厯侍中司徒相州
刺史封南平公所在著稱明元初與山陽侯奚斤北新侯安
同白馬侯崔宏等八人坐止車門右聽理萬機世號八公宋
武帝伐姚泓明元假嵩節督山東諸軍事傳詣平原緣河北
岸列軍次於畔城軍頗失利詔假宋武道宋武於卅中望嵩
麾蓋遣以酈酒及江南食物嵩皆送京師詔厚答之又敕簡
精兵爲戰備嵩與叔孫建等自成臯南濟晉諸屯戍皆望塵
奔潰會宋武克長安乃班師明元末問後事於嵩嵩曰立長
則順以德則人服今皇長子賢而世嫡天所命也請立之乃
定策詔太武臨朝監國嵩爲佐輔太武卽位進爵北平王司

州中正議征屈丐嵩固諫不可帝責之尋遷太尉加柱國大將軍自是輦駕征伐嵩以元老多留鎮京師坐朝堂平斷刑獄卒年八十謚曰宣王孝文時配饗廟庭子頽善騎射彎弓三百斤襲爵加侍中征南大將軍有罪黜爲兵復爵卒謚曰安子敦字孝友位北鎮都將降公孝文時復王爵卒謚曰簡子道字念僧襲爵例降公位左衛將軍卒謚慎子悅襲建義初復王爵尋降公位光祿少卿卒

長孫道生嵩從子忠厚廉謹道武愛其慎重使掌機密與賀毗等四人內侍左右出入詔命明元時除南統將軍冀州刺史太武卽位進爵汝陰公遷廷尉卿從征蠕蠕率眾出白黑兩漠間大捷而還從征赫連昌爲前驅遂平其國昌弟定走保平涼宋遣到彥之王仲德寇河南以救定詔道生屯河上

禦之遂誘朱將檀道濟邀其前後追至厯城而還除司空加
侍中進封上黨王卒年八十二贈太尉謚曰靖道生廉約身
爲三司而衣不華飾食不兼味一熊皮郭泥數十年不易時
人比之晏嬰第宅卑陋出鎮後子弟頗脩繕道生還歎曰昔
霍去病以匈奴未滅無用家爲今強寇尙遊魂漠北吾豈可
安坐華美也令毀其宅太武世所在著績每建大議多合時
機爲將有權略善待士眾帝命歌工厯頌羣臣曰智如崔浩
廉如道生與從父嵩俱爲三公當世以爲榮子旃位少卿早
喪

長孫禮道生次子少以父任爲散騎侍郎與襄城公盧魯元
等內侍恭敏有才志太武寵信之曰其父親近吾祖子在我
左右不亦宜乎

長孫肥代人昭成時年十三以選內侍少有雅度果毅少言
道武在獨孤及賀蘭部常侍從禦侮左右帝深信任之登國
初爲大將屢有軍功從平中山以功賜爵瑯邪公遷衛尉卿
改爵盧鄉時中山太守仇儒推趙準爲主肥討破準於九門
斬仇儒擒準除兗州刺史姚平寇平陽徵爲前鋒平退保柴
壁進攻屠之還鎮兗州撫慰河南威信著於淮泗善策謀勇
冠諸將前後征討未嘗失敗故每有大難令肥當之南平中
原西摧羌寇肥功居多賞賜千計後降爵藍田侯卒謚曰武
陪葬金陵

長孫翰肥子少有父風以善騎射爲獵郎明元在外與元磨
渾等潛謀奉迎明元卽位拾遺左右以功累遷平南將軍鎮
北境威名甚著太武卽位封平陽王蠕蠕大檀寇雲中太武

親征遣翰出長川討之大檀北遁追擊克獲而還遷司徒從
襲赫連昌破之翰清正嚴明善撫將士卒太武爲之流涕親
臨其喪喪禮依安城王叔孫俊故事謚曰威陪葬金陵子成
襲降公位南部尙書卒陪葬金陵翰弟陵位駕部尙書性寬
厚好學愛士封吳郡公贈王謚恭陪葬金陵

叔孫建代人少以智勇著稱道武幸賀蘭部常從左右登國
初爲外朝大人與安同等十三人迭典庶事參軍國謀隨秦
王觚使後燕歷六載乃還累遷中領軍賜爵安平公出爲并
州刺史後免明元念前功以爲正直將軍相州刺史飢胡劉
武等聚黨假建前號安平公督公孫表等討之斬首萬餘級
餘眾奔投沁水晉將王仲德遁滑臺兗州刺史尉建遁仲德
遂入滑臺詔建渡河曜威斬尉建呼仲德軍人詰其侵境之

狀尋遷廣阿鎮將威名甚著久之除使持節都督前鋒諸軍事楚兵將軍徐州刺史率眾自平原濟河徇下青兗諸郡遂東入青州圍宋刺史竺夔于東陽城宋遣將檀道濟王仲德救夔建乃還以功賜爵壽光公與汝陰公長孫道生濟河而南仲德等東走青州太武以建威名南震爲宋所憚除平原鎮大將封丹陽王加征南大將軍道濟仲德救滑臺建與汝陰公道生拒擊之建分軍挾戰縱輕騎邀其前後焚燒穀草以絕其糧道道濟兵飢叛者相繼由是安頡等得拔滑臺建沈敏多智東西征伐常爲謀主容貌清整雅尙人倫禮賢愛士在平原十餘年綏懷內外甚得邊稱魏初名將鮮及之南方憚其威略輒不爲寇太延三年卒年七十三謚曰襄賜葬金陵

叔孫俊字醜歸建子少聰明年十五內侍左右性謹密以便
弓馬轉獵郡清河之變與元歷磨渾等歸明元時明元左右
惟車路頭王洛兒等得俊大悅以爲爪牙及卽位稍遷衛將
軍賜爵安成公朱提王悅懷刃入俊覺舉動有異於悅懷中
得兩刃匕首執殺之明元以俊前後功重委以軍國大計羣
官上事先由俊銓校後奏聞性平正柔和未嘗有喜怒色不
諂上抑下奉詔宣外告示慤懃上下嘉嘆泰常元年卒年二
十八明元親臨哀慟贈司空安成王謚孝元賜溫明祕器載
以輜輶車衛士導從陪葬金陵子蒲襲爵後有大功及寵幸
貴臣薨賵賻送終禮皆依俊故事無得踰之者俊弟憐襲父
爵降丹陽公位尙書令涼州鎮大將與鎮副將奚牧相糾坐
誅

尉古真代人道武在賀蘭部賀染干遣侯引乙突等圖之古真密以馳告染干疑泄其謀以兩車軸押古真頭傷一目不服乃免後從平中原以功賜爵東川侯明元初爲鴻飛將軍鎮大洛卒于定州刺史子億萬襲

尉諸代人古真弟以忠謹著從圍中山先登傷一目道武歎曰諸兄弟並毀目以建功效誠可嘉也賜安樂子從平姚平拜國部大人太武時改邑遼西公卒子歡襲

尉眷代人諸長子忠謹有父風明元時爲太官令侍臣奚斤亡入蠕蠕眷追至虜庭擒之大檀前由是以驍烈聞太武命分典四部加陳兵將軍文成時拜侍中太尉封漁陽王錄尙書事文成北巡以寒雪議還眷曰今去都不遠而旋敵必疑我有內難方寒雪宜更進前不得遽返以啟敵心遂度漠而

還帝以眷元老賜杖履上殿卒謚曰莊子多侯襲

尉地干眷弟機悟有才藝馳馬立射五的時人莫能及太武時位庫部尙書加散騎常侍領侍輦郎奉上忠謹尤善嘲笑甚見親愛參軍國大謀時征平原試衝車以攻冢地干爲索所縶折脅而卒帝親往哭慟贈中領軍燕郡公謚曰惠子長壽位右曹殿中尙書賜爵會稽公卒於涇州刺史

婁伏連代人忠厚有器量年十三襲父領部落道武初從破賀蘭部又平中山及征姚平於柴壁以功賜爵安邑侯明元時爲晉兵將軍并州刺史太武卽位封廣陵公再遷光祿勳進爵王後鎮統萬卒謚恭子眞襲降公眞弟大援封鉅鹿子羅結代人從道武幸賀蘭部賜爵屈蛇侯太武初累遷侍中外都大官總三十六曹事年一百七歲精爽不衰太武以其

忠愍甚信待之監典後宮出入臥內因除長秋卿年一百一十詔聽歸老賜大甯東川爲私第別業并爲築城號羅侯城朝廷每有大事驛馬詢焉年一百二十卒謚曰正子斤從討赫連昌力戰有功歷四部尙書從平涼州賜爵帶方公除長安鎮都大將蠕蠕侵境除柔元鎮都大將卒謚曰靜陪葬金陵子敢襲位庫部尙書卒子伊利襲

穆觀字闡拔崇次子襲爵少以文藝知名明元中爲左衛將軍綰門下中書出納詔命及訪舊事未嘗有遺漏尙宜陽公主拜駙馬都尉位太尉太武監國爲右弼出則統攝朝政入則應對左右事無巨細皆關決焉終日怡怡無愠色勞謙善誘不以富貴驕人泰常八年卒年三十五明元臨喪悲慟賜通身隱起金飾棺喪禮一依安城王叔孫俊故事贈宜都

王謚曰文成太武每與羣臣談宴未嘗不歎息以爲自道武來佐命勳臣文武兼濟無及之者

穆翰崇第三子平原鎮將西海王卒子龍兒襲降公卒子弼有風格善自位置涉獵經史與長孫承業陸希道等齊名孝文定氏族欲以弼爲國子助教弼辭曰旣遇明時恥沈泥滓會司州牧咸陽王禧入帝曰朕與卿作州督舉一主簿卽命弼謁之因爲帝所知宣武初爲廣平王懷國郎中令數有匡諫之益除中書舍人卒於華州刺史謚曰懿

穆顗崇第四子有才力以侍御郎從太武征赫連昌勇冠一時賜爵泥陽子拜司衛監後從征白龍討蠕蠕以功進爵建安公拜殿中尙書出鎮涼州還加散騎常侍領太倉尙書文成時爲征西大將軍督諸軍西征吐谷渾坐逗留免官徙邊

文成以顗著勳前朝徵爲內都大官卒贈征西大將軍建安王謚曰康子寄生襲

穆多侯觀次子封長甯子位司衛監乙渾專權召司徒陸麗麗時在溫湯療疾多侯謂曰渾有無君心大王眾所望也去必危宜徐歸而圖之麗不從遂爲渾害多侯亦見殺

穆亮字幼輔壽孫平國第三子早有風度獻文時起家侍御中散尚中山長公主拜駙馬都尉封趙郡王加侍中徙封長樂王孝文時除征南大將軍領護西戎校尉仇池鎮將宕昌王梁彌博爲吐谷渾所逼來奔亮以彌博凶悖請納其從兄彌承孝文從焉於是擊走吐谷渾立彌承而還氏豪楊卜從軍二十一戰鎮將抑而不聞亮表卜爲廣業太守豪右咸悅境內大安徵爲侍中尚書左僕射尚書陸叡舉爲司州大中

正後拜司空參議律令例降爵爲公尋領太子太傅時將建
太極殿亮稽首請稽之卜筮又以去歲役作爲功甚多太廟
明堂一年便就若仍歲頻興恐人力彫弊且材幹新伐願待
逾年帝不從及遷都加武衛大將軍以本官董攝中軍事帝
南伐以亮錄尚書事留鎮洛陽後帝自小平津汎舟幸石濟
亮諫曰漢帝欲乘舟渡渭薛廣德將以首血汙車輪帝乃感
而就橋渭之小水猶尙若斯況洪河有不測之慮帝曰司空
之言是也後徙封頓邱郡公以紹崇爵宣武卽位拜尚書令
司空公卒宣武親臨小斂贈太尉謚曰匡

穆紹字永業亮子尙琅邪長公主拜駙馬都尉祕書監侍中
衛將軍太常卿中書令七兵殿中二尙書母憂以孝聞又歷
衛大將軍中書監侍中領本邑中正紹資性方重罕接賓客

領軍元乂往紹宅紹迎送下階而已及靈太后欲黜乂紹纘
成之以功加特進侍中元順與紹同直常因醉入寢所紹擁
被而起正色曰老身二十年侍中與卿先君亟連職事縱卿
後進何宜相排突也遂謝事還家詔諭乃起除侍中託疾未
起故免河陰之害莊帝立爾朱榮徵之捧手不拜榮亦矯意
禮之曰穆紹不虛作大家兒尋授尙書令司空進爵爲王給
班劔四十人仍加侍中尋復本爵普泰元年除驃騎大將軍
開府青州刺史加都督未行而卒贈大將軍尙書令太保謚
曰文獻子長蒿字子岳襲爵位光祿少卿

車路頭代人少以忠厚選給東宮爲帳下帥天賜末明元出
於外路頭隨侍竭力及卽位封宣城公忠意將軍性無害每
評獄處理常獻寬恕之議以此見重於朝帝亦敬納之卒明

元親臨哀慟贈太保宜城王諡忠貞喪禮依安成王叔孫俊故事陪葬金陵子眷襲

周幾代人少以善射爲獵郎明元初爲左部尙書以軍功封交趾侯太武以幾有智勇遣鎮河南威信著於外境進號宋兵將軍以萬人襲陝城卒於軍軍人歎惜之歸葬謚桓子步襲

于栗磾代人也少習武藝才力過人能左右馳射登國中拜冠軍將軍假新安子與甯朔將軍公孫蘭潛自太原從韓信故道開井陘關路襲慕容寶於中山道武後至見道路修理大悅卽賜以名馬及趙魏平帝置酒高會謂栗磾曰卿吾之黥彭也進假新安公道武田於白登山見熊將數子顧栗磾曰能搏之乎對曰若搏之不勝豈不虛斃一壯士自可驅致

御前坐而制之尋皆禽獲帝顧而謝之後爲河內鎮將劉裕之伐姚泓栗磾慮北侵擾築壘河上裕憚之遣栗磾書假道西上題書曰黑稍公麾下栗磾以狀表聞明元因之授栗磾黑稍將軍栗磾好持黑稍故有其號遷豫州刺史進爵新安侯洛陽雖歷代所都實爲邊界栗磾勞來安集甚得百姓心明元南幸盟津謂栗磾曰河可橋乎栗磾曰杜預造橋遺事可想乃編大船構橋於野坂六軍旣濟帝深歎美之太武之征赫連昌敕栗磾與宋兵將軍周幾襲陝城長驅至三輔進爵爲公累遷外都大官平刑折獄甚有聲稱卒贈太尉栗磾自少總戎迄於白首臨事善斷所向無前加以謙虛下士刑罰不濫太武甚悼惜之

于洛拔栗磾子有姿容善應對拜侍御中散太武甚加愛寵

因賜名焉轉監御曹令景穆在東宮厚加禮遇洛拔恆畏避不敢結納襲爵爲侍中尙書令百寮憚之卒官有六子

于烈洛拔長子善射少言有不可犯之色少拜羽林中郎累遷侍中殿中尙書與元丕陸叡李冲等各賜金策許以不死進爵洛陽侯轉衛尉卿遷洛敷鎮代留臺庶政一相參委與高陽王雍奉神主于洛陽遷光祿卿十九年大選百僚烈子登引例求進烈表引已素無教訓請乞黜落帝曰此乃有識之言不謂烈能辨此乃引見登進爲太子翊軍校尉又加烈散騎常侍封聊城縣子穆泰陸叡潛謀代鄉舊族同惡者多唯烈一宗無所染帝益器重之歎曰烈之節槩不謝金日碑除領軍將軍從征荆沔加鼓吹一部二十三年帝討齊將陳顯達執烈手以京邑爲託詔召宣武會駕魯陽烈處分行留

神守無變宣武卽位帝崩於行宮寵任如前咸陽王禧遣家
僮傳言求舊羽林武賁執仗出入烈不許禧遣謂烈曰我是
天子兒天子叔元輔之命與詔何異烈厲色答曰向亦不道
王非天子兒叔若是詔應遣官人所由若遣私奴索官家羽
林烈頭可得羽林不可得也禧惡烈剛直出爲恆州刺史烈
以疾辭景明二年正月初祭三公致齋於廟帝夜召烈將直
閤六十餘人宣旨召咸陽王禧彭城王勰北海王詳衛送至
帝前諸公各稽首歸政以烈爲領軍進爵侯自是長直禁中
機密大事皆所參焉咸陽王禧潛謀宣武出獵烈時留守處
分有備奏曰禧等不足爲慮願緩蹕徐還以安物望禧逃追
執之順后立以世父之重彌見優禮及卒舉哀朝堂給東園
第一祕器贈太尉封鉅鹿郡公子祚襲

于果洛拔次子嚴毅直亮有父兄風歷朔華并恆四州刺史
于勁字鍾葵洛拔第三子頗有武略位沃野鎮將賜爵富昌
子宣武納其女爲后封太原郡公妻劉氏章武郡君後爲征
北將軍定州刺史卒贈司空謚恭莊自栗磾至勁累世貴盛
一皇后四贈公三領軍三尚書令三開國公勁雖后父但以
順后早世竟不居公輔

奚斤代人世爲馬牧斤機辯有識度登國初統禁兵後爲侍
郎從征慕容寶於參合皇始初拜越騎校尉典宿衛博陵渤海
章武盜起斤與元遵等討平之從破高車及庫狄宥連部
徙其別部於塞南又進擊侯莫陳部至大娥谷置戍而還遷
都水使者出爲晉兵將軍幽州刺史賜爵山陽侯明元時爲
鄭兵將軍明元幸雲中斤留守京師昌黎王慕容伯兒不軌

召入天安殿東廡下誅之詔與長孫嵩等俱坐朝堂錄決囚徒明元大閱東郊行左丞相大蒐於石會山從西巡先驅討越勒部於鹿那山大破之又詔與長孫嵩等八人坐止車門左聽理萬機拜天部大人進爵公命出入乘輅軒備威儀導從太武聽朝政爲左輔宋帝立其國內離阻乃遣斤收河南地假節都督前鋒諸軍事司空晉兵大將軍行揚州刺史率吳兵將軍公孫表等南征攻滑臺不拔求濟師帝親南巡次中山斤自滑臺趣洛陽長驅至虎牢遂平兗豫諸郡還圍虎牢虎牢潰斤置守宰以撫之自魏初大將行兵唯長孫嵩拒宋武斤征河南獨給漏刻及十二牙旗太武時進爵宜城王仍爲司空太武征赫連昌斤率義兵將軍封禮等襲蒲坂斤又西據長城秦雍氏羌皆來歸附累戰破赫連定追定於平

涼定邀斤前後眾潰被擒太武克平涼斤得歸尋拜安東將軍降爵爲公太延初爲衛尉改恆農王後爲萬騎大將軍議伐涼州涼州平以戰功賜僮隸七十戶又賜安車以寵異之斤聰辯彊識善談論遠說先朝故事厯厯不爽聽者歎美之每議大政多見從用朝廷由是稱焉眞君九年卒年八十有九太武親臨哀慟謚曰昭王長子他觀襲降公傳國至孫緒無子國除太和中斤配饗廟庭至宣武時以緒弟子監紹其後

于什門代人明元時爲謁者使喻馮跋至和龍住外不入使謂跋曰大魏皇帝有詔須馮主出受然後敢入跋使人牽逼令入見不拜跋令人案其項什門曰馮主拜受詔吾自以賓主致敬何須苦見逼也與跋往復聲氣抗厲不撓跋止什門

什門於羣眾中回身背跋披褲後襠以辱之旣而拘留衣裳敗壞略盡蟣蟲被體跋遺以衣拒不受歷二十四年後宏上表稱臣乃送什門歸拜尙書侍御史太武下詔褒美比之蘇武賜羊千口帛千匹進上大夫策告宗廟班示天下

豆代田代人明元時以善騎射爲內細射從攻虎牢登樓射賊矢不虛發以功遷內三郎從征赫連昌乘勝追賊入其宮門門閉踰宮而出太武壯之拜勇武將軍後從破赫連定得奚斤等以定妻賜之詔斤膝行授酒於代田曰全爾身命者代田功也從討和龍有功封長廣公卒於統萬鎮大將贈王謚恭子周求襲

來大千代人父初眞官至後將軍武原侯大千驍果善騎射永興初襲爵位中散朝賀日常著御鎧盤馬殿庭遷內三郎

幢將典宿衛禁旅用法嚴明上下齊肅嘗從明元獵見獸在高巖上持稍直前刺之應手而死帝嘉其勇壯太武初爲常侍持仗侍衛晝夜不離左右累從征伐以戰功賜爵廬陵公鎮雲中兼統白道軍事巡撫六鎮經略布置甚得事宜後爲吐京都將討平吐京胡卒喪還停於平城南大武出遊還見而問之左右以對帝悼歎良久詔聽其喪入殯城內贈司空謚莊子邱顏襲降晉興侯

封敕文代人本姓是賁祖豆開府冀青二州刺史關內侯父湟侍御長贈定州刺史章武侯謚隱敕文始光初爲中散稍遷西部尙書出爲使持節開府領護西夷校尉秦益二州刺史賜爵天水公鎮上邽詔征吐谷渾拾歸於抱罕廣川公乙烏頭二軍會之軍次武始拾歸夜遁敕文引軍入抱罕虜其

妻子及人戶分徙千家於上邽留烏頭守枹罕金城邊冏天水梁會據上邽東城南城攻逼西城敕文先設備賊乃退冏會復攻城氏羌一萬屯南嶺休官屠各二萬餘人屯北嶺爲冏等形援敕文設奇兵大破之斬冏首冏衆復推會爲主安豐公閭根率軍來助會謀遁夜半乃飛梯騰塹而走敕文先掘重塹於東城之外嚴兵拒闕從夜至旦敕文謀曰因獸猶闕而況於人乃以白虎幡招之應時降者六百餘人會等分遣敕文縱騎騰蹕死者大半略陽王元達因梁會之亂推天水休官王官興爲秦地王討破之天安元年卒

古弼代人少忠謹善騎射初爲獵郎門下奏事以敏正稱明元嘉其直而有用賜名曰筆後改名弼言其有輔佐才也令典西部與劉潔等分綰機要敕奏百揆太武卽位以功拜立

節將軍賜爵靈壽侯歷侍中吏部尚書典南部奏事假節督
龍右諸軍討仇池楊保熾平之未幾楊文德復圍仇池弼攻
解其圍文德走漢川時東道將皮豹子欲還軍弼使謂曰若
其班師寇衆復至後舉爲難不出秋冬南寇必來以逸待勞
百勝之策也豹子乃止太武聞之曰弼言長策也制有南秦
弼謀多矣景穆總攝萬機徵爲東宮四輔與宜都王穆壽並
參政事遷尚書令弼雖事務殷湊而讀書不輟端謹慎密口
不言禁中事其功名等於張黎上谷人上書言苑囿過度宜
減大半弼入欲陳奏遇帝與給事中劉樹碁侍坐良久不獲
申聞乃起於帝前捽樹頭掣下牀以手搏其耳以拳毆其背
曰朝廷不理實爾之罪帝失容放碁曰不聽奏事過在朕樹
何罪置之弼具狀以聞帝奇弼公直皆可其奏弼曰爲臣逞

志於君前非無罪也詣公車免冠徒跣自劾請罪帝召之曰卿其冠履卿有何罪自今以後苟利社稷益國便人者雖復顛沛造次卿爲之無顧也太武獵河西弼留守詔以肥馬給騎人弼命給弱者太武大怒曰尖頭奴敢裁量朕朕還臺先斬此奴弼頭尖帝常名之曰筆頭時人呼爲筆公屬官懼誅弼曰田獵不過盤遊其罪小不備不虞使戎寇恣逸其罪大今北狄孔熾南虜未滅故選肥馬備軍實爲不虞之遠慮苟使國家有利吾甯避死乎明主可以理干此自吾罪帝聞而歎曰有臣如此國之寶也賜衣一襲馬二匹鹿十頭後車駕出山北獲麋鹿數千頭詔尙書發車牛五十乘運之帝謂從者曰寧公必不與我汝輩不如馬運之速遂還行百餘里而弼表至曰今秋穀懸黃麻菽布野猪鹿竊食鳥鴈侵費風波

所耗朝夕參倍乞賜矜緩使得少載帝謂左右曰肇公果如朕卜可謂社稷之臣吳王立爲司徒文成卽位與張黎並坐議不合旨俱免其家告巫蠱俱伏法時人冤之

乙瓌代人其先世統部落太武時瓌父匹知遣瓌入貢帝留之瓌善騎射手格猛獸尙太武女上谷公主除駙馬都尉賜爵西平公從駕南征都督前鋒諸軍事勇冠三軍後進王又爲西道都將卒年二十九贈太尉公謚恭子乾歸襲有氣幹習書疏尤好兵法尙景穆女安樂公主除駙馬都尉侍中獻文初爲秦州刺史有惠政孝文時爲中道都將卒謚康子海宇懷仁位散騎侍郎卒謚孝子瑗字雅珍尙孝文女淮陽公主除駙馬都尉累遷西兗州刺史天平元年舉兵應樊子鵠戰敗死

山西通志卷一百一十一
雜錄三
陳建代人以善騎射擢三郎遷下大夫內行長太武討山胡
白龍輕之單將騎數十每自登山白龍伏壯士出不意帝墜
馬幾至不測建以身捍賊奮擊殺數人被十餘創帝壯之賜
別戶二十文成初出爲幽州刺史假秦郡公李文初徵爲尙
書右僕射加侍中進趙郡公密表啟南伐帝嘉之遷司徒進
魏郡王卒子念生襲爵除

伊馥代人少勇健走及奔馬善射力曳牛卻行神靡初擢侍
郎轉三郎賜爵汾陽子太武將討涼州議者咸以無水草諫
唯司徒崔浩勸行馥曰涼州若無水草何得爲國宜從浩言
帝善之及克涼州大會於姑臧帝曰崔公智計有餘吾亦不
復奇之正奇馥弓馬士所見能與崔同耳顧謂浩曰馥智力
如此終至公相浩曰何必讀書然後爲學衛青霍去病亦不

讀書而致公輔帝欲以馥爲尙書封郡公馥辭曰中祕二省
多諸文士請參其次帝賢之拜祕書監賜爵河南公拜司空
清約自守政舉大綱大安二年領太子太保三年平尙書事
卒子蘭襲位庫部尙書卒子益生驍勇有膽氣累有戰功遂
爲名將以勳賜爵平城子爲西道都督戰歿贈雍州刺史
陸侯代人曾祖幹祖引世領部落父突道武初數有戰功位
離石鎮將上黨太守關內侯侯少聰慧明元初襲爵位給事
中典選部蘭臺事當官無所撓太武征赫連昌詔督諸軍鎮
以備蠕蠕與安頡攻克虎牢賜爵建鄴公拜冀州刺史考天
下第一轉虎牢鎮大將復轉安定鎮大將追討休屠金崖羌
狄于玉等皆獲之遷懷荒鎮大將徵至京言鎮將郎孤必敗
高車必叛明年諸莫弗果殺孤從帝征蠕蠕破涼州別督輜

重又渡河南略地仍遷長安鎮大將擊蓋吳于杏城獲吳二叔諸將欲送京師侯獨曰不如私許吳叔免其妻子使自追吳遂捨而與之期及期不至諸將皆咎侯侯曰此未得其便耳必不背也後數日果斬吳以至皆如其言侯之明略獨決皆此類也遷內都大官安定盧水劉超等畔詔加都督秦雍諸軍鎮長安侯單馬之鎮申以威信示以成敗超猶無降意侯乃率其帳下見超超使人迎曰三百人以外當以弓馬相待三百人以內當以酒食相供乃將二百騎詣超超備甚嚴遂縱酒盡醉而還後僞獫狁詣超與士卒約曰今會發機當以醉爲限侯乃詐醉上馬大呼斬超首士卒應聲縱擊遂平之帝大悅徵拜外都大官文成踐祚以子麗有定策勳進爵東平王卒年六十七謚成有子十二人少子騏驎侍御中散轉

侍御史太和初新平太守子高貴孝昌中兗州鎮東府法曹參軍

陸敬侯長子多智有父風文成謂朝臣曰吾常歎其父智過其軀是復踰於父矣少爲內都下大夫每能逆曉人意同事者無不愛之興安初賜爵聊城侯出爲相州刺史假長廣公爲政清平抑強扶弱州中有德宿老以友禮待之者十人號曰十善又簡取諸縣彊門百餘人以爲假子令歸家爲耳目於是豪奸摘伏百姓以爲神明無敢劫盜者在州七年家至貧約徵爲散騎常侍乞留者千餘人不許帝謂羣臣曰敬之善政雖古人何以加之賜絹五百匹奴婢十口相州吏人大斂布帛以遺之敬皆不受人亦不取爲起佛寺名長廣公寺後襲爵改封建安王宋司州刺史常珍奇以懸瓠內附銜旨

撫慰陷軍爲奴婢者皆免之人情乃定車駕討蠕蠕爲選部
尚書錄留臺事及獻文將禪位于京兆王子推蔽抗言曰皇
太子聖德承基四海瞻望不可橫議干國之紀臣請刎頸殿
庭有死無二久之帝曰蔽直臣也豈能保吾子乎遂以蔽爲
太保與太尉源賀持節奉璽綬傳位於孝文延興四年卒贈
本官諡曰貞王蔽有六子琇凱知名

陸麗侯次子少以忠謹入侍太武親之賜爵章安子稍遷南
部尚書宗愛殺南安王余百僚莫知所立麗首建大議與殿
中尚書長孫渴侯尚書源賀羽林中郎劉尼奉迎文成於苑
中而立之社稷獲安麗之謀也由是受心膺之任在朝者無
出其右興安初封平原王麗頻譏不聽乃啟以讓父文成曰
朕爲天下主豈不能得二王封卿父子耶以其父侯爲東平

王麗尋遷侍中撫軍大將軍司徒公復其子孫賜妻妃號麗
固辭不受帝益重之領太子太傅麗好學愛士常以講習爲
業父憂毀瘠過禮和平六年療疾於代郡溫泉聞文成喪欲
赴左右止之曰王德望素重姦臣若疾人譽慮有不測麗曰
安有聞君父之喪方慮患難便馳赴初乙弗渾恃傲麗數諍
之由是見忌害之謚曰簡王陪葬金陵孝文時配饗廟庭麗
二妻杜氏生定國張氏生胤定國在襁抱文成幸其第詔餐
宮內游止常與獻文同年六歲爲中庶子獻文踐阼拜散騎
常侍封東郡王定國以承父爵辭不許又以父爵讓弟胤乃
聽之俄遷侍中儀曹尙書轉殿中尙書前後大駕征巡擢行
臺鉉都曹事超遷司空延興五年坐事免爲兵太和初復除
侍中鎮南將軍秦益二州刺史復王爵八年卒於州贈本官

謹莊

陸琇字伯琳，敍第五子，母赫連氏，身長七尺九寸，甚有婦德。琇年九歲，敍欲以爵傳之，琇曰：「苟非闕力，何患童幼？敍奇之，遂立爲世子。琇卒，襲爵。琇沈毅少言，雅好讀書，爲侍御，長累遷祠部尚書司州大中正，坐事免。景明初，試守河內郡，咸陽之難，以不先送其子曇和逮繫。卒，琇弟凱上書訴冤，詔復爵。子景祚襲。

陸凱字智君，敍子，謹重，好學位。太子庶子給事黃門侍郎在樞要十餘年，以忠厚見稱。除正平太守，在郡七年，號爲良吏。孝文議革變舊風，國戚多怏怏，令凱私喻之，乃稍解。及兄琇陷罪，凱哭無時，節目幾失明，訴冤不已。至正始初，宣武復琇官爵，凱大喜，置酒集諸親，曰：「吾所以數年之中抱病忍死者，

顧門戶計耳今願已遂以其年卒贈龍驤將軍青州刺史諡惠

陸希道字洪度歙長子有風貌歷覽經史拜中散遷通直郎坐父事徙遼西後得還以軍功賜爵淮陽男拜諫議大夫累遷前將軍郢州刺史善于馭邊甚有威略轉平西將軍涇州刺史卒官贈撫軍將軍定州刺史有六子士懋字元偉天平中以曾祖麗功特復襲鉅鹿郡公位營州刺史士宗字仲彥尚書左外兵郎中士述字幼文符璽郎中建義初並于河陰遇害士沈出後所之士廉字季脩建州平北府長史永安末余朱世隆陷城見害士佩字季偉武定中安東將軍司州從事希道弟希悅尚書外兵部郎

陸眞代人父洛侯秦州刺史眞少善騎射太武時拜內三郎

眞君中從討蠕蠕以功賜爵關內侯後攻懸瓠登樓臨射城中弦不虛發從至江還盱眙眞功居多文成初進都昌侯爲選部尙書後拜長安鎮將時初置長蛇鎮眞率衆築城未訖而丘悅傳檀叛眞擊平之卒城長蛇而還東平王道符反于長安以眞爲長安鎮將進河南公長安平兵人素服其威信怙然安靜在鎮數年甚著威稱卒謚烈子延字契胡捉有氣幹襲爵例降汝陽侯位懷朔鎮大將太僕卿受使綏慰秀容爲牧子所害

和其奴代人少有操行善射御初爲三郎文成初封平昌公累遷尙書左僕射與河東王閼毗太宰常英等並平尙書事在官慎法不受私請遷司空加侍中及乙暉執林金閭以擅殺尙書楊保年之罪歸之其奴以金閼罪惡未分出之爲定

州刺史皇興元年詔討長安鎮將東平王道符未至而道符敗軍還卒內外歎惜之贈王諡曰宣子受襲

趙尼代人會祖敦有功爲方面大人父婁爲冠軍將軍尼勇果善射太武善之拜羽林中郎賜爵昌國子宗愛殺南安王余祕之唯尼知狀勸愛立文成愛不聽尼懼其有變密以狀告殿中尙書源賀仍共南部尙書陸麗謀於是賀與尙書長孫渴侯嚴兵守衛尼與麗至苑中麗抱文成於馬上入京城尼馳還東廟大呼曰宗愛殺南安王皇孫已登大位有詔宿衛士皆可還宮衆咸唱萬歲賀及渴侯登執宗愛賈周等勒兵而入奉文成入登永安殿以尼爲內行長封東安公尋遷尙書右僕射爲定州刺史在州清慎又爲司徒獻文特加尊重賜別戶四十皇興四年車駕北征兵陣不整帝以其功重

特恕之免官而已延興四年卒子社生襲

婁提代人獻文時爲內三郎獻文上賓提謂人曰尙安用活爲遂引佩刀自刺幾死文明太后詔賜帛二百匹

薛彪子代人祖達頭歸魏道武賜爵聊城侯待以上客禮賜妻鄭氏卒封贈冀州刺史謚悼父野脂并太二州刺史意東公有聲稱卒謚簡彪子姿貌壯偉明斷有父風爲內侍長典奏諸曹事當官正直內外憚之文明太后臨朝出爲枋頭鎮將素剛簡近臣嫉之因小過黜爲鎮門士獻文南巡彪子拜訴於路復除枋頭鎮將累遷開府徐州刺史多惠政百姓便之沛郡太守邵安下邵太守張攀贓汙案之於法安等誣彪子南通賊孝文曰此妄矣推案果虛卒謚文

崩撥代人父那濮陽太守撥爲太學生募從兗州刺史羅忸

擊賊於陳汝有功賜爵介休男討和龍擊吐谷渾皆有功進
爵子崇遷杏城鎮將大得人和文成以撥清平有惠績賜衣
服獻文初爲北征都將南攻懸瓠進安城侯爲北豫州刺史
卒謚敬

尉元字苟仁代人世爲豪宗父目斤有勇略位中山太守元
善射爲羽林中郎以匪懈見知稍遷駕部給事中賜爵當城
男和平中遷比部尙書進大昌侯天安元年薛安都以徐州
內附詔元爲持節都督東道諸軍事尋與城陽公孔伯恭赴
之宋兗州刺史畢衆敬亦遣東平太守章仇標歸款元並納
之遂長驅而進宋遣張永沈攸之屯下礧安都出城見元元
依朝旨授其徐州刺史遣中書侍郎高閭李琛與安都還入
城別令孔伯恭撫安內外然後入彭城元以永仍據險要命

安都與琛同守身率精銳揚兵於外分擊呂梁絕其糧道永
捐城夜遁乃遣高閭與張譙對爲東徐州刺史李琛與畢衆
敬對爲東兗州刺史而元拜開府都督徐州刺史淮陽公太
和初徵爲內部大官出爲使持節鎮西大將軍開府統萬鎮
都將甚得夷人之心三年進淮陽王聽乘步輦杖於朝齊高
帝旣立多遣間諜扇動新人以元威名夙振使總率諸軍捍
之東南清晏遠近怙然入爲侍中都曹尙書遷尙書令進司
徒十年例降山陽郡公頻表乞身詔許之元詣闕謝引見命
升殿勞宴賜元冠素服詔以元八十之年宜處三老之重游
明根七十之齡可充五更之選於是養三老五更於明堂禮
畢賜步輦一乘給上公祿十七年疾帝親省之卒諡景桓公
葬以殊禮給羽葆鼓吹假黃鉞班劔四十人子翊襲改博陵

郡公卒於恆州刺史諡順

朱長生于提並代人孝文時長生爲員外散騎常侍與提俱使高車高車王阿伏至羅責長生等拜長生拒之至羅乃不以禮待長生以金銀寶器奉之至羅旣受獻長生曰爲臣內附宜盡臣禮何得口云再拜而實不拜呼出帳令衆中拜至羅慙其臣下大怒曰帳中何不教我拜而辱我於大衆奪長生等獻物內之叢石以兵脇之曰爲我臣則活不降則殺汝長生與于提瞋目厲聲曰我爲鬼不爲汝臣至羅大怒絕其飲食從者三十人皆求至羅乃給以肉酪長生與提又不從乃各分徙之三辰放還孝文以節同蘇武拜長生河內太守提隴西太守並賜爵五等男從者皆爲令長

苟顏代人本姓若干父洛拔內行長顏厚重清直武力過人

擢爲中散小心謹敬賜爵建德男累遷司衛監洛州刺史抑
強扶弱山蠻畏威不敢爲寇太和中厯侍中都曹尙書進河
南公頽好直言李惠李訢之誅並致諫遷司空進河東王以
舊老聽乘步輦杖於朝大駕行幸三川頽留守京師沙門法
秀潛謀頽率禁旅收掩畢獲內外晏然卒諡僖王子愷襲例
降公

尉聿字成興代人性耿介明帝時爲武衛將軍時領軍元義
執權百寮莫不加敬聿獨長揖不拜尋出爲涼州刺史涼州
緋色天下之最義送白綾二千匹令染聿拒不受又諷御史
劾之驛徵至京覆無狀還任卒

朱瑞字元龍代郡桑乾人祖就沛縣令父惠行太原太守並
贈刺史瑞長厚質直敬愛人士余朱榮引爲大行臺郎中黃

門侍郎仍中書舍人榮居之門下爲心腹之寄封陽邑縣公
除侍中兼吏部尙書改封北海郡公莊帝還洛又改封樂陵
郡公仍侍中瑞雖爲尔朱榮所委而善處朝廷間帝亦賞遇
之嘗謂侍臣曰爲人臣當須忠實至如朱元龍者朕待之亦
不異餘人又爲青州中正轉滄州大中正尔朱榮死與世隆
俱北走以莊帝待之素厚於路乃還帝大悅以瑞兼尙書左
僕射爲西道大行臺慰勞尔朱天光尔朱兆入洛復還京師
都督斛斯椿先與瑞有隙數譖之於世隆遂被害太昌初贈
開府儀同三司青州刺史謚恭穆

樊子鵠代郡平城人父興平城鎮長史歸義侯普泰中贈荆
州刺史子鵠逢北鎮擾亂南至并州尔朱榮引爲都督府倉
曹參軍使詣京師靈太后問榮兵勢子鵠應對稱旨太后嘉

之除直齊封南和縣子令還赴榮建義初拜晉州刺史封永安縣伯永安二年以招納叛蜀進中都縣公又兼尙書行臺政有威信尋徵授都官尙書西荊州大中正兼右僕射爲行臺進西陽郡公尙書如故假驃騎將軍率所部爲都督時尕朱榮在晉陽京師之事子鵠頗預委寄故在臺閣征官不解後出爲殷州刺史歲旱勸有粟家分濟貧者并遣人牛易力多種二麥州內獲安尕朱榮死子鵠不從世隆等招以母在晉陽求移鎮河南莊帝嘉之除都督豫州刺史行達汲郡聞尕朱兆入洛乃渡河北徵赴洛奪其部衆將還晉陽東海王暕以爲侍中御史中尉中軍大都督太昌初兼尙書左僕射東南道大行臺總大都督杜德等追討尕朱仲遠仲遠奔梁收其兵馬時梁遣元樹據譙城詔子鵠與德討之樹大敗入

城遂圍之樹請歸南許之及樹眾半出子鵠擊破之擒樹及
梁譙州刺史朱文開遷吏部尙書轉尙書右僕射尋加驃騎
大將軍開府典選後除兗州刺史子鵠先遺腹心採察得失
及至境太山太守彭穆參侯失儀責讓之并數其罪狀州內
震悚孝武帝入關子鵠據城爲應南青州刺史大野拔率眾
就之天平初齊神武遣婁昭等攻城久不拔昭以水灌城大
野拔因殺子鵠以降

以上大同府

庾業延代人賜名岳其父及兄和辰世典畜牧稍轉中部大
人收斂畜產富擬國君劉顯之變道武外幸和辰奉獻明太
后歸道武又得其資用以和辰爲內侍長岳恭慎修謹善處
危難之間道武嘉之爲外朝大人參預軍國從平中原拜安
遠將軍詔岳討破離石胡帥呼延鐵西河胡帥張崇等以功

賜爵西昌公遷鄴行臺岳爲將有謀略士衆服其智勇名冠諸將及罷鄴行臺以所統六郡置相州卽拜岳爲刺史秉法平當百姓稱之鄴舊有園池時果初熟吏送之岳不受曰果未進御吾何得先食其謹如此遷司空以侯官誣告誅時人咸寬惜焉岳葬在代西善無界後太武征赫連氏經其墓詔爲立廟求子孫任爲帥者得其子陵從征有功聽襲爵府朔平

尔朱羽健其先居尔朱川魏登國初羽健爲領民酋長率契吳武士從平晉陽定中山拜散騎常侍以居秀容川詔割方三百里封之長爲世業太祖初以南秀容川原沃衍欲令居之羽健曰臣家世奉給使左右北秀容旣在剡內差近京師豈以沃瘠更易遠地太祖許之卒子鬱德襲甯武府

李栗雁門人也昭成時父祖入國少辯捷有才能兼有將略

初隨太祖幸賀蘭部在元從二十一人中太祖愛其藝能時王業草創爪牙心腹多任親近惟栗一介遠寄兼非戚舊當世榮之數有戰功拜左軍將軍太祖征慕容寶栗督五萬騎爲前驅軍之所至莫不降下遷左將軍栗性簡慢每在太祖前舒放倨傲咳唾任情太祖積其宿過天興三年遂誅之於是威嚴始厲制抑羣下盡謙卑之禮自栗始也

張黎鴈門原平人善書記道武知待之明元尤器其忠亮賜爵廣平公管總機要太武以其功舊除大司農卿軍國大議黎常與焉征赫連定有功進號征北大將軍鎮長安清約公平甚著聲稱代下家無餘財太武征涼州蠕蠕吳提乘虛入與司空長孫道生拒擊走之景穆初總百揆與崔浩等輔政忠於奉上非公事不言詔賜浩黎布帛各千匹吳王余立爲

太尉文成卽位與古弼俱誅

李熙字士元雁門人神龜四年以博士徵官至太平太守賜爵平原子王道雅閔弼並雁門人與熙俱徵至拜祕書郎高允撰徵士頌云士元先覺介焉不惑振袂來庭始賓王國蹈方履正好是繩墨淑人君子其儀不忒又云道雅洽聞弼爲

兼識

以上代州

柳崇字僧生河東解人七世祖軌晉廷尉卿崇方雅有器量身長八尺美鬚明目兼有學行舉秀才射策高第解褐太尉主簿轉尚書右外兵郎中檢斷河東河北二郡上下息訟屬荆郢新附又持節經略加慰諭還遷太子洗馬本郡中正累遷河中太守郡中畏服卒于官贈岐州刺史謚穆崇文章冠亂遺失長子慶和性沈靜不競于時位給事中本部中正卒

慶和弟楷字士則身長八尺善草書頗涉文史位撫軍司馬
裴佗字元化河東人六世祖詵晉太常卿避地涼州東歸居
解縣世以文學顯五舉秀才再舉孝廉時人美之父景惠州
別駕佗容貌魁偉隤然有氣望舉秀才以高第除中書博士
累遷趙郡太守威惠甚著狡吏奸人皆改貫所得俸祿分卹
貧窮轉前將軍荊州刺史郡人戀仰傾境餞送蠻酋田盤石
田敬宗等部落萬餘家恃險不賓前後牧守未能降款佗單
使宣慰示以禍福敬宗聞風歸附於是合境清宴襁負至者
千餘家後加中軍將軍以老乞還卒遺令不聽請贈不受贈
襁諸子遵之佗性剛直不好交俗人投分者必當時名勝不
事家產宅不過三十步又無田園暑不張蓋寒不裘衣其貞
儉若此

以上
解州

裴駿字神駒小名皮河東聞喜人父雙碩位恆農太守安邑
子贈東雍州刺史聞喜侯駿幼而聰慧親表稱爲神駒因以
爲字弱冠通涉經史方檢有禮度鄉里宗敬焉汾陰薛永宗
應蓋吳來襲聞喜駿率厲鄉豪奔赴賊退會太武親討蓋吳
引見駿駿陳敘事宜帝大悅謂崔浩曰裴駿有當世才其忠
義可嘉補中書博士浩亦深器駿曰爲三河領襲轉中書侍
郎宋使明僧暲來聘以駿有才學假給事中散騎常侍於境
上勞接卒贈秦州刺史聞喜侯諡曰康長子修字元寄次宣
裴宣字叔令少孤事母兄以孝友稱通辯博物司空李冲見
而重之孝文初徵爲尙書主客郎累遷太尉長史請令州郡
戍邏埋掩骸骼并符出兵之鄉使招魂祔祭復其年租調傷
疾者免其兵役從之出爲益州刺史至州綏撫甚得戎羌之

心宣常慕廉退謂親賓曰吾本無當世志直隨牒至此祿厚
養親效不光國可以言歸矣因奉表求解不許乃作懷田賦
以敘心焉宣素明陰陽書尅亡日如其言贈豫州刺史諡曰
定尋改爲穆

裴詢字敬叔修子美儀貌多藝能音律博奕咸所閑解位平
昌太守尙太原長公主特除散騎常侍司徒召爲本邑中正
詢護族叔昉時論善之尋監起居事遷祕書監出爲郢州刺
史表蠻酋田朴特爲西郢州刺史及梁將李國興寇邊朴特
與部曲爲表裏聲援郢州獲全朴特頗有力焉徵爲七兵尙
書武泰中以本官兼侍中爲關中大使未及發於河陰遇害
贈司空公諡貞烈無子

裴敬憲字孝虞宣子少有志行學博才清撫訓諸弟專以讀

書爲業澹於榮利風氣俊遠郡徵功曹不就諸府辟命先進其弟司州牧高陽王雍舉秀才射策高第除太學博士性和雅未嘗失色於人工隸草解音律五言獨擅一時名聲甚重後進咸宗慕之中山王將之部朝賢送於河梁賦詩言別以敬憲爲最少有氣病年三十三卒人甚悼之敬憲世爲德鄉里孝昌中蜀賊陳雙熾所過殘暴至敬憲宅輒約束不得焚燒爲物所伏如此永興三年贈中書侍郎諡曰文

裴莊伯字孝夏宣次子博識多聞文才與敬憲相亞器度閑雅喜愠不形於色善以約言辨物司空在城王澄辟行參軍甚加知賞年二十一上神龜頌時人異之臨淮王彧北討引爲記室參軍委以章奏及聞敬憲寢疾求假不許遂徑自還亦矜而不問扶侍兄病晝夜不離形容憔悴因葬敬憲遇病

卒年二十八兄弟才學知名同年俱喪世共嗟惜之永安三年贈通直散騎侍郎諡曰獻兄弟並無子所著詞藻莫爲集錄弟獻伯廷尉卿濟州刺史少以學尙風流有名京洛爲政傷於嚴但以清白流譽遷殿中尙書卒

裴美敬憲從弟務之子少有美名舉秀才咸陽王雅相賞愛欲妻以女美拒不納除奉朝請

裴延儻字平子河東聞喜人魏冀州刺史徽之八世孫曾祖天明諮議參軍并州別駕祖雙彪河東太守贈雍州刺史諡順父山崧州主簿行平陽郡事以平蜀賊丁虫功贈東雍州刺史延儻少孤事後母以孝聞涉獵墳史有才筆舉秀才射策高第除著作佐郎累遷太子洗馬又領本邑中正以宮官例免宣武初爲中書侍郎上專心釋典延儻疏諫除司州別

駕時詔立明堂羣官博議延儔獨著一堂之論太傅清河王
懌讀而笑曰子故欲遠符僕射也明帝時累遷幽州刺史范
陽郡有舊督亢渠徑五十里漁陽燕郡有故戾陵諸埭廣袤
三十里皆廢毀多時莫能修復延儔表求營造遂躬自履行
相度形勢隨力分督未幾而就溉田百萬餘畝爲利十倍百
姓賴之又命主簿鄭惲修起學校禮教大行人歌謠之在州
五年考績爲天下最拜太常卿歷七兵殿中二尚書散騎常
侍中書令御史中尉又以本官兼侍中吏部尚書後於河陰
遇害贈儀同三司都督雍州刺史子元直敬猷並有學尚同
遇害元直贈光州刺史敬猷超贈尚書僕射

裴聿字外興河東聞喜人以操尚貞立被孝文所知爲北中
府長史帝以聿清貧欲以幹祿優之命帶溫縣時人榮之卒

於平秦郡太守贈洛州刺史子子襲入關西

裴粲字文亮魏冀州刺史徽之後父叔業兄颺並仕齊景明
初隨父兄內附封舒縣子沈重善風儀厯正平恆農二郡太
守高陽王雍曾以事屬粲粲不從後修謁雍含怒待之粲神
情閑邁舉止抑揚雍目之不覺解顏坐事免後宣武欲觀其
風度令傳詔就家急召之須臾問使者相屬合家慙懼粲更
恬然神色不變帝歎異之時僕射高肇朝士咸望塵拜謁粲
唯長揖而已人尤之粲曰何可自同凡俗也又曾詣清河王
懌下車屬暴雨粲容步舒雅不以霑濡改節乃令人持蓋覆
之歎曰何代無奇人後爲揚州大中正中書令明帝釋奠爲
侍講轉金紫光祿大夫節閔初復爲中書令正月晦臨洛濱
粲起御前再拜上壽酒帝曰卿昔戒北海以酒今何異於往

情榮曰北海志在沈湎故諫其所失陛下齊聖溫克敢獻微誠帝爲命酌孝武初出爲驃騎大將軍膠州刺史禱雨海神直據胡牀舉杯曰僕白君左右言例皆拜謁榮曰五岳視三公四瀆視諸侯安有方伯致禮海神卒不冑拜時青州賊耿翔乘其無備掩襲州城尋爲翔害送首於梁子含字文若員外散騎侍郎

裴良字元賓河東聞喜人爲尙書考功郎中汾州吐京胡薛羽等作亂以良兼尙書左丞爲西北道行臺大破五城郡山胡馮宜都等於雲臺郊又山胡劉蠡升狂獫以良爲汾州刺史加輔國將軍行臺如故良以城人饑窘夜率眾奔西河汾州居西河自良始孝靜初爲衛大將軍太府卿卒於官贈吏部尙書諡貞又重贈侍中尙書僕射子叔祉居官有聲績位

終司空左長史

以上絳州

賀悅訥從弟道武居賀蘭部下人情未甚附惟悅舉部隨從又密爲帝祈禱天神請成大業出於誠至帝嘉之甚見寵待後平中原以功賜爵鉅鹿侯進爵北新公卒子泥襲降肥如侯清河之變泥出舉烽於安陽城北賀蘭部人皆往赴之明元卽位乃罷與元渾等八人拾遺左右與安同行并定二州州郡肅然後從征赫連昌以功進爵琅邪公軍國大議每參預焉征蠕蠕爲別道將坐逐賊不進贖爲庶人拜光祿勳爲外都大官復爵卒子醜建襲

和跋代人世爲附臣至跋以才辨知名道武擢爲外朝大人參軍國大謀雅有智算賜爵日南公從平中原以功進尙書銀青光祿大夫以破慕容德軍改封定陵與常山王遵討賀蘭部別帥

木易干破之出爲平原太守跋好修虛譽道武戒之不革被刑跋世居豺山祠墓具存後太武蒐豺山每遣祭之

賀拔度拔神武尖山人父爾頭驍勇絕倫以良家子鎮武川因家焉宣武時以功賜爵龍城縣男爲武川鎮軍主度拔性果毅襲父爵正光末沃野人破六韓拔陵反懷朔鎮將楊鈞聞其名召補統軍配以一旅賊僞署王衛可瓌徒黨尤盛攻沒武川又陷懷朔度拔與子並爲賊所虜乃與宇文肱合謀率州里豪傑珍念賢乙弗庫根尉遲檀等招義勇襲殺可瓌朝廷嘉之未及封賞度拔與鐵勒戰沒孝昌中追贈肆州刺史

賀拔岳字阿斗泥度拔第三子少有大志愛施好士初爲大學生及長能左右馳射驍果絕人不讀兵書而暗與之合與

父兄赴援懷朔賊衛可環在城西三百餘步岳乘城射中環臂賊大駭爲廣陽王深帳內軍主與兄勝俱鎮恆州州陷投介朱榮爲都督計事多與榮合榮赴洛配甲卒二千爲先驅至河陰榮欲稱尊號岳從容致諫榮尋亦自悟以定策功賜爵樊城鄉男從破葛榮平元顥累遷左光祿大夫武衛將軍時万俟醜奴僭號榮以介朱天光爲使持節大都督雍州刺史岳爲左廂大都督以侯莫陳悅爲右廂大都督並爲天光之副以討之赤水蜀賊兵斷路天光眾不滿二千軍次潼關天光有難色岳進破之於渭北軍容大振時醜奴圍岐州遣其大行臺尉遲菩薩僕射万俟行醜同向武功南渡渭水攻柵天光遣岳率千騎赴援菩薩已克柵率步騎二萬至渭北岳於渭南傍水分精兵數十爲一處隨地形勢置之明日將

百餘騎隔水與賊相見且並東行岳漸前進騎隨岳而集賊不測其多少行二十許里至水淺可濟處便馳馬東出賊謂岳走乃棄步兵南渡渭水輕騎追岳岳東行十餘里依橫岡設伏兵以待身先士卒急擊之賊退走岳號令所部賊下馬者皆不聽殺賊悉投馬俄虜三千人馬亦無遺遂擒菩薩仍渡渭北降步卒萬餘醜奴棄岐州北走安定天光方自雍至與岳合勢輕騎追醜奴及于平涼之長阮一戰擒之又執蕭寶貨於高平城以歸賊行臺万俟道洛退保屯岳攻之道洛敗入隴投略陽賊帥王慶雲岳與天光度隴至慶雲所居永洛城賊頻出城拒戰並就擒餘悉阮之三秦河渭瓜涼鄯州咸來歸款賊帥夏州人宿勤明達降復叛又討擒之天光雖爲元帥而岳功效居多進封樊城縣伯尋詔都督涇州刺

史進爵公天光入洛使岳行雍州事普泰初除都督岐州刺史進清水郡公尋加侍中給後部鼓吹進位開府儀同三司兼尚書左僕射隴右行臺仍停高平討平隴中餘賊二年加都督雍州刺史天光將拒齊神武岳曰莫若且鎮關中以固根本天光不從果敗孝武初加關中大行臺永熙二年孝武密令岳圖齊神武刺心血持以寄岳岳懼自詣北境安置邊防率眾趨平涼西界布營數十里齊神武遣左丞翟嵩至關中間岳及侯莫陳悅三年岳召悅會高平將討曹泥令悅前驅悅誘岳入營被害於幕中朝野莫不痛惜之贈侍中太傅錄尚書事都督關中二十州諸軍事大將軍雍州刺史諡曰武壯翟嵩復命神武下牀鳴其頰曰除吾病者卿也何日忘之後岳部下以王禮葬岳於雍州北石安原子緯嗣拜開府

儀同三司周保定中進爵霍國公尙周文帝女

侯深神武尖山人機警有膽略孝明末隨杜洛周後與妻兄
念賢歸尔朱榮爲中軍副都督莊帝封厭次縣子從討葛榮
於湓口戰功尤多除燕州刺史時葛榮別帥韓樓郝長等屯
據薊城榮令深討樓配眾甚少或疑之榮曰深臨機設變是
其所長者總大眾未必能用止給騎七百深遂廣張軍聲率
數百騎深入樓境去薊百餘里遇賊帥陳周馬步萬餘人大
破之虜卒五千餘還其馬杖縱令入城左右皆諫深曰我兵
少不可力戰事須爲計以離隙之深度其已至遂率騎夜進
昧旦叩城門韓樓果疑降卒爲內應遂遁走追擒之賜爵爲
侯尋爲平州刺史鎮范陽尔朱榮死太守盧文偉圯之深勒
兵南向進至中山敗行臺僕射魏蘭根東海王煜授侯同三

司定州刺史左軍大都督滎陽郡公節閔帝加開府永熙初
除齊州刺史孝武入關城人劉桃符等潛引汝陽王暹入據
西城深出奔會承制以深行青州事深襲高陽郡克之親率
輕騎夜趣青州城人執刺史東萊王貴平出降及樊子鵠平
以封延之爲青州刺史深遂奔梁爲賣漿者所殺以上歸

右後魏一百三人

魏舊號代故部族均稱代人地

周非青州之亦代亦不止今大開一郡也惟後
來定都平城則所謂八姓三十六族多聚居京邑
國當舉大同爲代之統稱耳舊志所採魏書代人
頗備尤不以族姓類從年次弟多失次又收及遷洛
諸人尤失限斷今別爲次第擇其有據者移入朔
南歸綏至武川爲六鎮之一地在塞外而志以爲
甯武與以懷朔爲今朔州殊疎於考核今並改正

山西通志卷一百十八

山西通志卷一百十八